

明

史

明史卷三百八十五

儒林傳

儒林三

尤時熙字季美洛陽人生而警敏不群弱冠舉嘉靖元年鄉試時王守仁傳習錄始出士大夫泥舊聞多力排之時熙一見輒有省嘆曰道不在是乎向吾役志詞章抑末矣已而以疾稍從事養生家則又嘆曰新建公致良知之旨所謂養生主者非與何以他為自是深信而力體之十一年授元氏教諭父喪除改官章丘一以致良知為教兩邑士亦知新建之學十九年入為國子博士時徐階為祭酒雅重時熙命六

館士咸取法焉及年四十念古人道明德立語忽淚
下居常以不獲師事守仁為恨且曰學無明師終不
能有成聞即中劉魁得守仁之傳遂師事之魁以直
言錮詔獄則書所疑時時從獄中質問尋以戶部主
事推執游聖課足而止不私一錢二十六年念母老
丐終養歸自是遂不出日以修己淑人為事足未嘗
涉公府齋中設守仁位晨興必焚香肅拜來學者亦
令展謁晚年病世之學者憑虛見而忽躬行甚且越
繩墨自恣故其論議必依乎中庸切于日用而不為
玄虛隱怪之談其善學守仁而救其末流之弊又若

此卒于萬曆八年九月年七十有八其門人孟化鯉
最著自有傳

張後覺字志仁山東茌平人也父文祥由鄉舉官廣
昌知縣後覺生有異質舉止端莊事親孝居喪哀毀
三年不御內室早歲聞良知之說于縣教諭顏鑰欣
然有省遂精思力踐偕同志講習已而貴谿徐樾以
王守仁再傳弟子來為叅政後覺率同志往師之學
益有聞久之以歲貢生授華陰訓導會地大震人多
傾壓死上官令署縣事救災扶傷下胥悅服及致仕
歸士民泣送載道東昌知府羅汝芳提學副使鄒善
皆宗守仁學與後覺同志善為建顏學書院碑六郡

士師事焉汝芳亦建見泰書院時相討論猶以取交
未廣北走京師南遊江左務以親賢講學為事門弟
子日益進凡吏于其土及道經荏平者莫不造廬問
業巡撫李世達兩詣山居值後覺病不能為禮乃促
席劇談飽其既食而去平生不作詩不談禪不事著
述行多遠近學者稱之為弘山先生年七十六以萬
曆六年七月卒其門人孟秋趙維新最著秋自有傳
維新亦荏平人年二十聞後覺講良知之學遂師事
之往復參證大悟性命之宗曰幾罔此一生矣因次

其問答語為弘山教言性純孝居喪五味不入口柴
毀骨立杖而後起鄉人欲舉其孝行力辭之喪偶五
十年義不再娶嘗築垣得金一篋工人持之去維新
不問但囑之曰慎勿泄泄則人妬汝矣家貧或併日
而食超然自得亦以歲貢生為長山訓導年九十二
無疾而終先是孟秋之沒巡按御史既為立祠維新
言于知府李士登亦立祠祀後覺士登又建四賢祠
祀王道穆孔暉及後覺秋四人云

朱恕字光信泰州樵夫也日採薪養母一日過鄉人
王良講堂歆曰離山十里薪在家離山一里薪在山
良聞之謂門弟子曰小子聽之道病不求耳求則不

難不求無易也恕聞之而喜于是每檣歸必造階下
竊聽饑則向厨人乞漿解所裹乾構以食聽畢復浩
歌員薪去艮門人矚其然轉相驚異有宗姓者招而
謂之曰吾貸汝數十金別事生涯庶免作苦且得日
與吾輩遊恕受金俯而思繼而大恚曰子非愛我者
我得是金將朝暮經營之不暇不大悞我一生耶即
擲還之有監司知其賢召之不往以事役之短衣跣
足入監司與成禮而去韓貞者字以中興化陶人也
以陶瓦為業慕恕之風從學于艮已卒業于艮子襲

略曉文字有茅屋三間以之償責遂居廢窖中年踰
三紀無妻孥弟子醵金爲之娶久之學有得遂以化
俗爲任隨機指導農工商賈從之遊者數百人秋成
農隙輒聚徒談學一村畢又之一村前歌後應結誦
之聲洋洋如也縣令聞而賢之遺米二石金一錢受
米返金令問政對曰貞窶人無能補于左右第與貞
居者幸無訟牒煩公府此貞所以仰報明府也御史
耿定向行部至大會艮祠下語及故相喜怒失常貞
撫捄叫曰安能若我識此區區意耶定向笑曰窮居
而意氣有加亦損也孺顧曰韓生識之大行窮居一

視焉可也每會講有談世事者貞輒曰光陰有幾乃作此閒談耶有尋章摘句者則大恚曰舍當下不理會而掇拾陳言此豈學究講肆耶自號樂吾學者因稱樂吾先生其後有夏叟廷美者繁昌田夫孝友忠信見稱里人教諭張緒物色之招與講學一日緒號于衆曰夫學學爲人也爲人須爲真人毋爲假人叟慨然內省曰吾平日所爲得毋未真耶隆慶中往謁耿定向與處踰時因定向而師于焦竑漸有得以竑教始讀四書久之謂定向曰此讀四書傳註意未了然第以正文尋繹乃有會處如所云異端者謂其端

異也吾人須研究為學初念其發端若何若祇為榮肥計即異端也何更闢為謂竝曰竊疑孔孟學同乃有聖賢之別何也近反覆誦思如論語中孔子自謂未能者七何有于我者亦七而孟子篇中殊未之見此其為聖賢之別乎史諸詮解多此類聞者莫不異之而其踐履篤實一時學士大夫或反有愧云

呂潛字時見涇陽人父應祥禮科都給事中潛少有志尚從學于高陵呂柟柟甚重之生平言行一以柟為法母病葦欲識其婦而命之娶潛娶而不婚三年喪畢然後入室嘉靖二十五年舉于鄉入國學時朝

紳有講會潛叅與其間歸與里人郭郭講學谷口洞
中從遊者甚衆薦授國子學正舉行柶祭酒時學約
稍違工部司務以萬曆六年卒郭字維藩受學于潛
父應祥舉嘉靖三十七年鄉試後應祥將葬遂輟會
試不行其篤于師誼如此學以持敬為主終身不敢
屑越歷官獲嘉教諭國子助教戶部主事終馬湖知
府卒年八十八與潛同師呂柢者又有張節李挺節
字介夫潛同縣人始受業于湛若水繼復從柢遊柢
稱其守道不回卒年八十挺字正立咸寧人秉性孤
直不隨俗浮沉既學于柢復赴三原從馬理講學道

為盜所殺人咸惜之又有王之士者字欽立藍田人
與郭郭同舉于鄉既而屏棄帖括潛心理學作養心
圖定氣說書之座右閉閣不出者九年蒿拔蠹食尚
友千古謂藍田風俗之美由于宋呂氏今其鄉約具
在乃歲為十二會赴會者百餘人洒掃應對冠婚喪
祭悉本其約行之美俗復興萬曆十八年祭酒趙用
賢薦于朝詔授國子博士除目下而之士己卒年六
十三

朱陳埽字壽儀寧府鎮國中尉猷王七世孫也曾祖
鎮國將軍宸澤方巖有行王宸濠欲屈之數火其居

而全宗人助之資固辭不受以故獲免于難祖輔國將軍拱擬孝友誠篤居暗室無愠容父奉國將軍多燿亦端謹好經術親課誅埽以五經史漢諸書課埽亦束脩自好閉門諷誦無世祿驕侈之習遂淹通群籍曉本朝掌故明興以來宗支繁衍諸王孫好學敦行著賢聲者周藩中尉睦摯而外未有若謀埽者也萬曆十九年給事中葉初春請設江西宗正舉課埽學行二十二年以撫按疏荐令攝石城王府事攝事三十年宗人咸就其約束性好著書所著百十二種稿至數易皆手自繕寫不以假人既寢疾猶與諸子

說易夜分不倦及卒南州人士私謚為貞靜先生

王敬臣字以道長洲人江西叅議庭子也幼讀詩至野有死麕章掩卷曰孔子放鄭聲是詩胡為存哉必漢儒誤拾其已刪者宋人承陋不能辨耳十歲值清明節書几曰天何以清人何以濁天何以明人何以昏長老咸異之十四侍父京師誦四箴註悟孔子求仁之旨嘆曰學在是矣心者動之主心無妄念則非禮之動安從生自是居處必以禮雖燕褻必正襟危坐居數年父命還鄉應舉泣不忍離再被命始行歸則室廬隘甚寄居僧寺鬻書自給有饋餐者却之不

已則書壁云不食嗟來食寧為溝壑夫其人乃止十
九為諸生即受業崑山魏校他人爭尚文藝獨默坐
澄心曰學不聖賢雖虛詞凌厲君子不貴也客有招
飲者見座中有妓亟趨出曰吾何以衣冠坐塗炭耶
自是遂絕宴會性至孝父里居三十餘年所以娛事
者百端疽發于背親自吮舐老得瞽眊疾則卧于榻
下夜不解衣微聞警效聲即躍起問安父自外歸則
迎于門風雨迎于途以為常事繼母如事父母性下
急臧獲少拂意輒憤怒至擊毀器物敬臣跪而解不
得則蒲伏戶外至達旦母久而感其誠亦為底豫妻

失母歆自責曰身不行道求行于妻子閉戶者愆不入室者十三載嘗以銀器質于人踰年往贖其人誤授以金器趣僕還之而其人更以布資僕僕不受曰主行義而我為利乎嘉靖末提學御史耿定向廉其學行俾越次克貢以親老辭其初受業魏校得黜成之旨嘗言議論不如著述著述不如躬行故居常杜口不談自見定向語以聖賢無獨成之學由是多所誘掖弟子從遊者至四百餘人然其學惟慎獨為先而指親長之際衽席之間為慎獨之本尤以標立門戶為戒學優德劭鄉人尊稱為少湖先生萬曆中以

廷臣薦徵授國子博士力辭不行詔以所授官致仕
二十一年巡按御史甘士价復薦吏部以敬臣年高
請有司時加優禮詔可年八十五而終

來知德字矣鮮夔州梁山人十歲通舉子業舉嘉靖
三十一年鄉試四赴會試不第遂焚棄路引專意養
親及二親相繼沒廬墓六年不飲酒茹葷服除傷二
親不及祿養終身麻衣蔬食誓不枉見有司其學以
致知為本盡倫為要謂大學之格物乃格去物欲猶
孔子克己復禮為仁孟子養心莫善寡欲之意皆除
去有我之私也識者善之其所著有省覺錄省事錄

理學辨疑心學晦明解諸書而周易集註一編用功尤篤自言學莫邃于易初結廬釜山學之六年無所得後遠客求溪山中潛精覃思者數年始悟易象又數年始悟文王序卦孔子雜卦之意又數年始悟卦變之非蓋二十九年而後書成其專精如此萬曆三十年總督王象乾貴州巡撫郭子章合詞論荐特授翰林待詔知德力辭詔以所授官致仕有司月給米三石終其身靜坐觀書老而彌勵壽八十終

鄧元錫字汝極南城人資穎朗絕倫五歲屬對奇警師為避席稍長輒博覽經史十五喪父哀毀水漿不

入口十七行社倉法惠其鄉人十九為諸生遊邑人
羅汝芳之門即銳然棄經生業專事問學又走吉安
謁諸先達請益學愈有聞尋以祖母命復事經生業
以嘉靖三十四年舉于鄉念二母年高不赴會試居
三年母力趣之道出吉安復從鄢守益劉邦采劉陽
諸宿儒論學會鄉邑寇警即馳歸侍養欲遂屏居不
出母不可又三年始一赴會試既下第歸遂不復出
杜門著述踰三十年五經皆有成書研精覃思閎深
博奧一時學者莫不推尊之稱為潛谷先生休寧范
涑初知南城重元錫後為南昌知府以萬曆十六年

入覲薦元錫及劉元卿章奏于朝南京祭酒趙用賢亦請優加徵聘如吳興弼陳獻章故事得旨有司起送部試元錫固辭明年御史王道顯復與元卿並荐且請倣祖宗徵辟成憲無拘部試得旨令有司問病痊可起送赴部竟不行二十一年巡按御史秦大夔復並荐二人詔以翰林待詔徵之有司敦遣益迫乃始上道甫離家而卒年六十有六鄉人私謚文統先生元錫之學其淵源雖本于王守仁而不盡宗其說時心學盛行謂學惟一覺一覺即無餘蘊九容九思四教六藝皆桎梏也元錫力排之謂九容不修是無

身也九思不慎是無心也四教六藝何一可廢故其
生平博極群書而要歸于六經醇如也所著五經釋
函史上下編皇明書並行于世

劉元卿字調父安福人為諸生有聲同邑鄒德涵講
學于里以其學語元卿輒心喜歸取宋人語錄讀之
益喜遂有志聖賢之學舉隆慶四年鄉試明年會試
對策極陳時弊主者不敢錄張居正聞而大怒下所
司申飭且令人密調之其人反以情告乃獲免既歸
師事同邑劉陽王守仁弟子也萬曆二年再赴會試
不第遂絕意科名務以求遂為事已而出遊蘭谿訪

徐用檢之黃安訪朕定向夢是向悟生生謂易之旨
欣然自信學益進從遊者日益廣給事中鄒元標御
史朱鴻謨祭酒趙用賢相繼荐于朝有詔徵用力辭
二十一年御史陳大夔再荐乃召為國子博士擢禮
部主客主事疏請早朝勤政又請從祀鄒守益王艮
于文廟登正外蕃朝貢舊儀尋見時事不可為遂引
疾歸益肆力撰述有山居草還山續草諸儒學案賢
奕編思問編禮律類要大學新編諸書年六十六以
萬曆三十七年卒自吳興稱後元卿及鄧元錫章潢
並蒙荐辟時號江右四君子

章潢字本清南昌人資穎拔年十六為諸生即有志
聖賢之學覃精經籍或問子近日談經益簡當何也
曰昔讀書如以物磨鏡磨久而鏡始明今如以鏡炤
物鏡明而物自見居父喪哀毀血溢已構此洗堂聯
同志講學以通天地人曰儒自命為輯自古河洛太
極諸圖爰及天道地道人道悉以類編次凡百二十
七卷曰圖書編又著周易象義詩經原體書經原始
春秋竊義禮記劄言論語約言諸書名播遠邇弟子
從遊甚衆神宗時提學僉事朱廷益躬造其廬聘主
白鹿書院知府范涑入覲辭之朝不報巡按御史吳

達可再荐之章下吏部侍郎楊時喬請遂授順天府
儒學訓導如陳獻章來知德故事有司月給米三石
贍其家報可卒于萬曆三十六年年八十二其鄉人
稱漬自少迄老口無非禮之言身無非禮之行交無
非禮之友目無非禮之書乃私謚文德先生

馮子咸字受甫臨朐人父惟健見文苑傳子咸少孤
事母孝母疾不解衣者踰年沒而哀毀骨立氣息僅
屬事兄亦盡敬萬曆元年舉于鄉再赴會試不第幡
然曰吾情異捧檄何以科第為遂捐舉子業不復出
初從外舅冀鍊聞濂洛之學日以莊敬自持一切積

習力祛之世俗所共趨力矯之曰勿目放恣為灑落
又尺寸寸而已舅以為拘吾無恤焉已而靜坐久之
覺有所得曰道在是乎吾向不識虛靈之體而從事
于莊敬若徽纆然故去道遠夫學須靜信矣其大旨
務在識心體而涵養之以推及于裊身應務皆設誠
而致行之居常嘆俗夫世敗始于禮亡欲酌古今為
一書推行宜自宗族始乃修家廟定祭儀立族約設
好會名曰敦睦勅宗人世守之治家宗顏氏家訓恒
以義勝躬秉耒耜佐以陶冶自食其力人餽之不受
曰恐吾無以報也所居里巷環而依之者百餘家

歲大祲家止薄田數十畝。娣族黨出粟賑貸。親為劑量貧者予之。有地可耕者取償于豐年。明年稍豐鄉人爭還粟。乃設義倉以備荒。死喪者亦取給焉。與父老約各以禮義訓子弟。毋得干有司法。鄉人率其教多為善良。所著日進劄記。自警私錄。耕餘筆談。讀禮抄。具有深識。遠詣然不以示人。亦不聚徒講學。凝然守正而已。或問為學曰。須剛須恒。不剛則墮。不恒則退。問敬曰。惺惺之謂敬。繩束非敬也。年四十九而卒。知與不知莫不掩泣。私謚為貞靜先生。鄉人鍾羽正稱子咸貞。不抗俗。隱不肆志。信道忘仕。則添雕子循。

經蹈古則高子羔孔門四科處廷九德其殆廢乎人
以為篤論

杜偉字道升吳江人六歲時祖母病盲或言舐之即
愈偉如其言果復明己貢于給事中沈漢家冒其姓
漢愛其穎敏令與諸子同學以嘉靖三十一年舉于
鄉專志聖賢之學與唐樞許孚遠為師友江西羅洪
先聞其賢聘為子弟師偉即從受學時與靜生石蓮
洞學益有得偉以受沈氏恩深漢卒為督訓諸孫經
紀其家隆慶時漢孫位舉進士官翰林偉始復姓位
卒遭家難偉傾身營護迄終其孤萬曆八年謁選得

南陽推官治獄稱平嘗署為鄉新野二縣事課農桑恤孤獨行鄉約治行冠河南入為工部主事權稅荊州不私一錢專務寬恤課乃不及額期滿引疾歸登舟見二木桶訛曰此非荊州物乎投之江而去以缺額且不赴考覈被論當事重其清恭特免考覈常自是不復出其學務主靜而尚躬行規言矩步不欺暗室有妻婦夜奔為正坐曉以大義婦慚悔而去未仕時歲大潦巡撫自行縣督租有斃杖下者偉跽大門外請免釐荆水沒脛不起巡撫乃回車渡鄱陽湖有盜入其舟端坐不動盜詢知為偉駭曰此即江南小

聖人耶偉因勸諭羅拜而去所著有正學編靜坐訣
學聚順性二錄四書尚書筆記諸書卒年七十一

陳履祥字光庭祁門人得南城羅汝芳之傳萬曆間
設教寧國先後及門者至八百餘人門生施弘猷汪
有源輩為築同仁會館講學其中先是世宗朝汝芳
為寧國知府剏志學書院與鄉薦紳貢安國梅守德
沈寵等講良知之學文教大興至神宗時張居正廢
天下書院遂改為公館講會亦輟及是文教復興諸
生多蒸蒸嚮學郡有雲山泉石佳勝履祥遊而樂之
乃築傳經臺日事著述自號九龍山人弘猷復構講

堂其側聯同志居之其學務闡性旨與人言迎刃而
解妙能啟悟所著有九經翼碩果大成諸書晚以歲
貢生入都卒于道弘猷輩還葬祁門而藏衣冠于雲
山立祠奉祀其後寧國及鄰郡人士講學猶本其緒
論焉弘猷字允升宣城人有源字性清太平縣人兩
人並敦學行有陳門顏魯之目弘猷嘗得危疾履祥
齋戒為文額天請代曰惟施子能昌吾道也及履祥
沒聚講祠下其卒也因附祀焉有源既傳履祥之學
數遊南都與揚起元周汝登焦竑鄒元標會講晚于
邑中結歸源會力誘後進以履祥昔居雲山亦徙居

之年八十卒即葬履祥墓側。

徐三重字伯同松江華亭人為人貞靜寡嗜欲恬於進取萬曆二年既舉會試不就廷對歸益務博覽五年成進士以與望當獲館選有鄉人忌之為謗言遂不赴試尋奔母喪戴星而行哀毀骨立服除授刑部主事時張居正當國政尚嚴刑官務深文取悅三重獨持平為尚書嚴清所罷令總諸司章奏益矜恕有聲甫三年輒謝病歸自是遂不出家居四十二年年七十有八卒學者重其行稱為鴻洲先生三重自幼嗜學有至行常赴友人飲庸闕有妓即託故避去讀

書里舍有隣婦自媒終不一賤所親者而無子寄資其家且云身後即以相遺三重亟返之其學務崇踐履以考亭為宗旨壯迄老編摩未嘗釋手默沉黙自晦恒恐人知絕跡公廷長吏不獲見其面惟神光兩朝國喪始出哭臨亦不見當事而返其嘉言懿行遠近奉為模楷士大夫語家法者率推徐氏為第一云所著有庸齋日記信古餘論瞻景錄采芹錄鴻洲雜著徐氏家則諸書子禎援舉進士歷官四川副使克遵父訓亦以清節聞

焦竑字弱侯南京江寧人為諸生有盛名從督學御

更既定向問學有所悟入復質疑于羅汝芳益有省
舉嘉靖四十三年鄉試下第還適定向進十四郡名
士讀書崇正書院以竑為之長及定向里居復往從
之自是日以講學為事至萬曆十七年始以殿試第
一人官翰林修撰竑久負時名及是名動天下乃竑
日從事學問益討習朝章國典精勤不懈先是歲貢
生徒試多所黜落及竑與閱卷憫之言於內閣許國
曰諸生需次數十年一旦被斥不得沾升斗祿何以
歸見家人族黨且廣文一席縱年如伏生寧不能授
經乎國許之自是歲貢生無黜落者二十二年修國

史內閣陳于陛欲竑專領其職竑謝不敏乃先撰經籍志其他率無所撰館亦竟罷翰林教小內侍書者衆視爲具文竑獨曰此曹他日在帝左右所係實大安得忽之乃取古奄人善惡可爲法戒者時爲論說諸奄喜咸稱竑先生善教皇長子出閣擇講官六人竑與焉故事講官進講罕有問者竑講畢徐曰博學審問功用惟均敷陳或有未盡惟殿下賜明問皇長子稱善然無所質難也一日竑再進曰殿下言不易發得毋諱其誤耶從來解則有誤問復何誤古人不耻下問願以爲法皇長子復稱善而竟無所問竑與

同列謀曰吾儕啓其端以便下問若何衆然之通講
舜典竑舉稽于衆舍己從人為問皇長子曰稽者考
也考集衆思然後舍己之短從人之長又一日舉上
帝降衆若有恒性皇長子曰此無他即天命之謂性
也時方十三齡答問無滯由是中外咸知睿質之美
亦由竑善啓之也嘗講次值群鳥飛鳴皇長子為仰
視竑輒肅立輟講俟皇長子歛容聽乃復講如初竑
每講畢必取先朝典制及閭閻疾苦脩陳之皇長子
亦虛懷聽納深加獎勞他日候文華殿內侍以繩擁
皇長子出驚問之曰中寒未奉旨不敢輟也竑急趨

告于張位請奏聞位欲需之明日又告于趙志率乃
得請竑嘗為養正國說採古儲君事可為法戒者擬
進之同列郭正域輩惡其不相聞目為賈譽竑遂止
尋有疑其取他途密進者因其疏聞神宗優旨褒答
同列益不悅竑既負重名性復疏直於時事有所不
可輒形之言論以故政府多惡之而張位尤甚會二
十五年順天鄉試所司以考官名上神宗特度次用
竑於是諸不獲者亦弗悅北榜發舉子曹蕃等九人
文多險誕語都下遂有浮言而給事中項應祥曹大
成即擬以入告大成至誡竑為莽操譊溫且及其他

事竑既辨言科場故事正考閱易書二經副考閱詩
春秋禮記三經今所摘多正考中允全天叙所取臣
不待辨章並下所司竟黜二人永停二人會試餘悉
停科俟再試竑福寧州同知房考何崇業等亦被
謫而置天叙不問一時物論頗不平歲餘大計復鐫
秩再調竑遂不出久之吏部屢推太僕丞尚寶少卿
南京國子司業終不復起竑博極群書自經史至裨
官雜說無所不淹貫善為古文時海內盡宗王李竑
獨不附麗所作與正馴雅卓然名家生平著述甚富
有易筌禹貢解遜國忠臣錄獻徵錄澹園集等二十

種澹園者竑所自號也自未仕至家居無日不講學
然以羅汝芳為宗而善取定向弟定理皆禪學也故
其學亦悉入于禪其訓門人亦時以禪機相關悟頗
為識者所譏萬曆四十八年年八十無疾卒熹宗時
以先朝講讀恩復官贈諭德賜祭廕子南渡時追謚
文端

郝敬字仲輿京山人父承健舉于鄉官肅寧知縣敬
幼有異質稱神童而性跂踈不可制父既老以屬其
友人李維禎及沒維禎教戒備至敬不能改後坐殺
人繫獄維禎入視涕泣開諭直諸官而出之且館之

于家親為督課敬始折節讀書舉萬曆十七年進士
歷知縉雲永嘉二縣有能聲徵授禮科給事中乞假
歸養二十六年起補戶科時用師朝鮮而餉不繼敬
列上損益十事所司議行其半俄奏屯田事宜謂祖
宗籌邊至計莫善屯田自屯政廢而畿輔東南沿海
以至大江迤北皆為稼穡之區今皆鞠為茂草頃歲
大軍東征計十餘鍾不能致一石而數千里之膏腴
乃任其荒蕪不治計之左也因條上十六策其說甚
具時不能行山東稅監陳增貪橫為益都知縣吳宗
堯所奏帝不罪敬上言開採不罷則陛下之明旨不

過爲愚弄臣民之虛文奈何。臣豎輩不弁髦視之。乞
先行停止。然後以宗堯所奏下撫按勘覈。正增不法
之罪。不聽頃之山東巡撫尹應元亦極論增罪。帝怒
切責應元。斥宗堯爲民教。上言臣觀陛下處陳增一
事。竊慮自今以後。臣豎之虛焰張。天忠臣之正氣掃
地。外廷之讜論絕響。而讒夫之利口橫生。天下事莫
之所底。帝怒奪俸一年。并奪應元半年。帝又納千戶
鄭一麟百戶馬承恩奏。遣中官高案推稅京口。豎祿
權稅儀真。教復抗疏力諫。宗堯之劾增也。增怒甚。誣
訐其賍私詞。連青州闔府官僚。旁引商民吳時奉等。

請皆籍沒帝輒可之敬又上言宗堯以強直取罪既加之箠楚幽之圜圉不啻足矣而增復羅織不已必欲籍其家逮其妻孥隣里族黨一何狠也律惟叛逆始有籍沒之法陛下數年以來所籍沒罪人多矣大抵皆仇家之訐告絕無佐證奸人借以紓不平之恨而使陛下蒙不美之名臣竊痛之今內帑之財不為不富又取諸皇店皇店不足取諸開礦開礦不足取諸抽稅抽稅不足取諸鬻鹽鬻鹽不足取諸籍沒古稱貨悖而入者亦悖而出又曰財聚則民散臣愚睹其入則慮其所以出也見其聚則憂其所以散也伏

顧杜告訐之路草聚歛之風速寢增奏毋聽鍛鍊之
詞致宗堯一家之哭更為東南萬家之慘亦不納敬
居諫垣數有論奏而為要人所惡謫知江陰縣懼蹇
不得志投劾歸自是杜門謝客專務著述五經及周
禮儀禮論語孟子咸為之解超然朗詣不襲先儒成
說窮經者盡宗之又著山草堂二十八種皆談經緒
論自古儒者釋經之勤未有若敬者初官縉雲開湖
州教諭鮑士龍嘗從王幾講良知善名理往師之命
吏布席明倫堂一如童子就傅禮其虛懷樂善如此
堂不設賓座婢僕垢衣敝裙搃作門內未嘗知門外

事年四十卽卜窆窆爲死制自作輓歌刻柩旁至七
十四擇吉日藏衣冠簪爪于槨中荷鍤兆所告后土
請以今年爲死年今辰爲葬辰他時勿更擇日誅茅
啓坎親屬素衣冠奠積而封樹焉旁置石匣函著書
三伯二十四卷以殉至崇禎十二年冬八十二日
早起衣冠命內外沐浴作書別故人乘輿出至墓所
題數語堂柱儵然而逝

吳桂森字叔美無錫人父汝倫給事中桂森幼有志
行長同顧憲成高攀龍講學東林書院又敍五經會
集子姓講習聞同郡錢一本善易往從之遊盡得其

指要先是東林書院之興。罵成實主講席。罵成沒攀
龍主之。及天啓初。攀龍官于朝。桂森遂主之。已而魏
忠賢亂政。殺攀龍。毀天下書院。東林遂廢。忠賢敗。桂
森復建麗澤堂。來復齋。聚同志講習如初。為人孝友。
好行德惠。初以歲貢生當得學官。桂森棄不就。布衣
蔬食。郡邑長欲見不可得。時東林與席者率貴顯。獨
桂森以書生抗其間。因自號素衣學者。稱為素衣先
生。卒年六十有八。所著有周易像象述書經說曲禮
說息齋筆記諸書。同邑許世卿字伯魚少孤。事祖及
母以孝聞。舉萬曆十三年鄉試。端介不與俗浮沉。常

揭安貧五戒省事五戒于壁有求者輒指壁示之一
日所親以贖錢急來請世卿鬻婢以應終不犯干謁
戒也東林之會攀龍以前輩事之門庭落然不容一
俗客訓其子曰人何可不學但口不說欺心語身不
為欺心事出無慙友朋入無慙妻子方可名學人耳
里黨咸誦其言

辛全字復元絳州人幼稱神童見書輒讀讀即欣然
若有得以家酷貧不能從師遂廢學年十五父兄復
命讀書見所載程朱事嘆曰我固謂天地間當有此
等人也即為作贊錄其言行敘法之父沒哀毀盡禮

事母及兄以孝友聞叅政畢白宸知其賢造廬相訪
提學副使南居益招致試以明體適用策廩餼之自
是始有室年二十七矣己師事安邑曹于牀走關中
師事長安馮從吾學益有聞巡鹽御史李日宣巡按
御史祝嶽巡撫都御史吳性先後禮聘講學荐于朝
不報崇禎八年以歲貢生入都尚書賀逢聖祭酒倪
元璐御史路振飛交章論荐詔許錄用請假歸明年
卒於家年四十九門人私謚曰文敬先生所著有樂
天集養心錄諸書全早有令譽天啟時高攀龍與人
書曰辛子聖質也見在己是吳康齋等輩再進此一

步大儒矣其為名人推許如此後劉宗周評全則曰復元之儒儒而偽者也蓋譏其近名云

顧大韶字仲恭常熟人太常卿雲程子也與死大章學生大章仕於朝以忤魏忠賢致死而大韶老于諸生通經史百家及內典于詩禮尤精其論詩謂當以毛傳為主毛必不可通然後用鄭鄭必不可通然後用朱毛鄭朱皆不可通然後網羅衆說而斷以己意其論禮記謂宋以前惟知鄭注孔疏自宣和有好古之主于是三代器物襍出于墟墓之間學者得以證漢儒之謬而陳氏集說出焉朱有集說學者之患在

于疑而不能明既有集說學者之患又在于明而不能疑不可不深維而自得也于儀禮周官亦多所發明他如辨五帝世繫辨李翱五木經正蘇洵太玄論駁蘇轍洪範五事說縱橫浩瀚不下數萬言于近代諸儒少許可獨推卓爾康十五國風論以為通儒爾康勸大韶著書答曰春秋以前作者之事脩矣雖有聖人但述而不作宋元以來述者之事脩矣雖有志士但當誦而不述爾康無以難也監司馮元颺行部至造門修謁請所著書亦以斯言謝焉晚語友人吾欲取十三經諸子墜言滯義標舉數則勒成一書竊

比程大昌演繁露王應麟困學紀聞庶有以謝友人
易簣前始繕寫所箋詩禮莊子付之其子世所傳炳
燭齋隨筆是也大韶自負才高傑然有志當世棄晚
病廢志意約結不得施好為文章以自慰諭同邑程
嘉燧以李文饒擬之

卓爾康字去病仁和人萬曆四十年舉于鄉本生母
卒終喪三年初授祥符教諭入為國子學錄歷兵部
司務南京刑部員外郎工部郎中坐事貶常州府簡
較量移大同推官遷兩淮運司判官罷歸賊陷京師
年已七十五悲憤遺病卒爾康為人孤峭介特憤時

俗重進士科，厚自洒濯，所至不屑浮沉。尤究心經濟，神宗時，河決山東，爾康遠下第還南京，急遣使覈糧，往視儕輩，咸目笑之。舟車南北，每迂道沿汭訪問，河淮分合形勢，作河渠議十篇。他若禮樂郊廟財賦轉運錢法官制，各有成書。其於兵事尤善，人初以為迂。及官大同，盧象昇方為總督，重爾康將吏謁，見畢輒延入後堂，揖使上坐，咨兵事。爾康謝不敏，則隅坐抗談，漏下乃已。象昇用其策奏効為多。其于學無所不該，而尤邃于經術。所著易說五十卷，詩學四十卷，春秋辨義四十卷，談經者尚之。文震孟進講春秋將錄。

其書以獻會去官不果其他詩文又二十卷同時鄭
光弼字右君慈谿人受學族人一蘭一蘭受之同邑
顏鯨鯨受之山陰王畿遠有端緒故光弼深于性命
之學萬曆時以歲貢生為餘杭訓導性方介疾惡兩
生員俊才而多譴行長吏優假不問光弼至坐明倫
堂聲其罪而杖之一邑震動終光弼任無敢佻達者
遷安吉州學正督學使者謁文廟日旰不至諸生候
久饑疲甚光弼曰謁廟而不夙駕是慢先師也諸生
第歸即有譴吾自當之諸生退而督學至問諸生安
在光弼曰日云莫矣諸生散矣為非行禮文廟之時

也侃侃廷辨不屈督學大怒杖之十遂解印辭官後
為太平府教授而前是餘抗兩生已成進士遂囑所
私勅罷之光弼經學深醇著有易繹孝經義彙永孝
編孔廟禮樂考諸書其散軼者尚多卒于崇禎末年
七十餘

黃淳耀字蘊生嘉定縣人生而穎朗甫就塾輒篝燈
夜誦父母憐其弱尼之則伺人定後更從鄰舍乞火
端坐默識年十七為諸生試輒冠其曹時科舉文浮
靡淫麗深疾之乃原本經術一出以深醇典雅遂名
噪海內場屋士無不奉為楷模性寧靜惡一時召士

爭務聲利獨淡漠自甘不事微逐以崇禎十五年舉
于鄉明年秋第進士名益高時方行館選奔競若鶩
獨捷戶晏居耻不肯預既歸益耽研經籍緼袍糲食
蕭然一室不知世有紛華事已而京師陷福王立于
南都諸進士悉授官淳耀獨不赴選及南都亡淳耀
與里人侯峒曾據邑城自守已而力不支乃携弟淵
耀入僧舍將自盡僧曰公未服官可無死淳耀曰是
何言歟城亡與亡豈以出處貳其心哉乃索筆書曰
弘光元年七月廿四日進士黃淳耀自裁于城西僧
舍嗚呼進不能宣力王朝退不能繫身自隱讀書寡

益學道無成耿耿不昧此心而已遂與淵耀相對縊
死年四十有一越七日屍猶不腐時益異之淳耀弱
冠即著自監錄知過錄有志聖賢之學後為日曆書
之所為夜必書之凡語言得失念慮純襍無不脩識
用自省改晚而克養和粹造詣益深所作詩古文亦
悉軌于先正卓然名家有陶菴集十五卷其門人私
謚之曰貞文淵耀字偉恭諸生好學寡行如其兄其
死也人尤賢之

朱朝英字美之浙江海寧人也生而沉潜好古力學
舉崇禎十三年進士除旌德知縣明年以外艱歸尋

遭國變遂隱居息交務以窮經為事初障浦黃道周
精易象曆數之學以授時曆分配三百八十四爻驗
古今治亂詞旨深奧諸弟子咸莫能通朝瑛受業其
門獨能通之已遂編釋五經多破前儒成說名之曰
五經畧記所與辨質惟同邑張次仲敵廬蕭然不見
嘉愠年六十六而卒次仲字元峪八歲母疾割股而
愈已而上官欲奏旌謝曰童子何知思之尚有餘愧
可復以此為名耶舉天啓元年鄉試久之不第亦不
求仕既遭喪亂益奮力經術于詩易二經並有著述
其持論間與朝瑛殊然歸趣一也卒年八十有八

岳薦字西來山陽人叅政鍾秀從子也生而端凝如
成人稍長肆力經史百家尤好洛閩之學反身實踐
造詣篤實性至孝左右就養務悅親心值歲饑已食
糠覈而父母甘旨未嘗缺沒則哀毀骨立至成羸疾
有庶弟甫生其母暴卒遠薦亦生女令婦棄女而乳
其弟弟患瘍曉夜啼不止夫婦更相懷抱遂俱染瘍
至滯血淋漓其婦亦無怨色里中劉昌言重其人延
為二子師曰岳先生非徒經師乃人師也是時天下
多故薦究心經世之務及遭喪亂遂棄諸生屏居田
里益務誦晦持身嚴重不苟訾笑燕居危坐若對神

明雖盛暑衣冠不去體其接人則務為和易誨里黨子弟諄切不倦終身未嘗去書而不喜著述間發為歌詩或辨論古人動輒數百千言然不以示人有勸著書者曰古今作者多矣其可傳者能幾人人顧自安何如耳鄉人莫不重其行稱為西來先生卒年五十一

論曰學者講究功夫為說甚夥要之賦畀之始本體完足無有欠餘所謂人受天地之中也諸儒厲志聖學畢生矻矻雖未皆大行得志分量充滿然性天已定亦豈以窮達為加損哉况乎資稟弗侔造詣亦各

別苟學焉得其所近即具體而微俱不失為聖賢之
徒矣譬之半銖亦金一勺亦海等類而並觀寧云殊
異乎獨是見地有淺深功候有疎密出入離合之介
亦不無毫厘之或差則擇之精而辨之嚴又在於後
之善學者矣

明史卷三百八十六

文苑傳

文苑一

文也者道之可見者也故非窮理不為功理明而氣
斯舉焉即聲光出焉匪是則弗文也明也興也蓋彬
彬乎有其文矣洪永而後下逮正嘉作者無慮數百
氏其體非一其格亦屢更大都指授所歸具有端緒
理必衷於正氣必澤於醇所謂近道之文居多也隆
萬而降乃大變矣理則詭而弗經也氣則靡而弗振
也體日雜而格日陋古文之道於是乎絕矣雖運會
所乘愈趨于下抑亦當時作者之咎也今簡其尤著

者臚列而疏校之可以觀文風矣亦可以規世道矣
胡翰字仲申金華人自幼聰穎異常兒七歲時道拾
遺金坐守其人而還之長從蘭谿吳師道游博習經
史已從浦江吳萊學古文後登同邑許謙之門學益
邃時同郡黃潛柳貫以文章名天下見翰文稱之不
容口進元都公卿交譽之與武威余闕宣城貢師泰
尤契合或勸之仕不應既歸遭天下大亂避地南華
山著書自適太祖下金華召見命與許元等會食中
書省後侍臣復有薦翰者召至金陵時方籍金華民
為兵從容進曰金華人多業儒鮮習兵籍之徒廉餉

耳太祖卽罷之授衢州教授洪武初聘修元史書成
受賚歸愛北山泉石卜築其下徜徉十數年而終年
七十有五所著有春秋集義文曰胡仲子集詩曰長
山先生集

蘇伯衡字平仲金華人宋門下侍郎轍之裔也父友
龍受業許謙之門嘗為吏于閩浙歷蕭山令行省都
事並有樹立明師下浙東坐長子仕閩謫徙滁州李
善長奏官之力辭歸伯衡警敏絕倫博洽群籍為古
文有聲元末嘗貢于鄉明太祖置禮賢館伯衡典馬
歲丙午用為國子學錄遷學正居國學五年多所造

就有薦于太祖者即日召見擢翰林編修力辭老賸
不就已而吏部欲別用伯衡念遠親日久乞省親歸
洪武十年學士宋濂致仕太祖問誰可代者濂對曰
伯衡臣卿人學博行修文詞蔚瞻有法要不可以微
疾廢太祖即徵之既見擬授官復以舊疾辭賜衣鈔
而還二十一年聘主會試事竣復辭還尋為處州教
授坐表箋誤下吏死二子怙怙救父并被刑伯衡淳
樸寡欲年四十得婚平居正襟凝思凡寒暑風雨利
欲紛華皆莫之知故能覃精義理發為文章弘博醇
茂為世名家

王冕字元章諸暨人也幼貧父使牧牛竊入學舍聽
諸生誦書輒能記憶暮歸忘其牛人有牽牛責蹊田
者父怒撻之已而復然母曰兒癡如此曷不聽其所
為冕因去依僧寺夜出坐佛膝上執策映長明燈朗
誦達旦會稽韓性聞而異之錄為弟子遂稱通儒性
卒門人事冕如事性著作郎李孝光欲薦為府史謝
曰吾有田可耕有書可讀安能晨夕抱案立庭下俯
奴使哉居小樓上不輕見人有使者行郡坐馬上求
見拒之去去不數武輒倚樓長嘯使者聞之大慚屢
薦舉不中歎曰此童子羞為者吾可溺是哉遂棄去

北將江淮抵燕都客秘書卿泰不花家擬以館職薦
力辭曰公誠癡人不十年此中狐兔游矣何以仕為
既歸每大言天下將亂時海內無事成斥為狂笑曰
成不為狂誰當狂者携妻孥隱九里山樹梅千株桃
杏半之自號梅花屋主嘗做周官著書一卷秘不示
人夜深輒挑燈朗諷既而撫卷曰吾未即死持此以
遇明主伊呂事業不難致也當風月佳時操觚賦詩
千百年不休善畫梅求者踵至以幅長短為得米之
差人以方楊補之笑曰吾藉以自給豈求名耶已而
天下兵起果如其言明太祖下婺州將攻越物色得

之置幕府授諮議參軍一夕病卒冕負雋才能詩文
有志用世既遇明主而不獲一試論者惜之同時郭
奎錫炳皆早參戎幕亦以詩名奎字子章巢縣人從
余闕學治經闕亟稱之世亂飄零渤海太祖為吳國
公仗劍來歸從事幕府歲辛丑朱文正開大都督府
于南昌命奎參其軍事居五年文正得罪奎亦坐誅
炳字彥男鄱陽人至正中以義旅從軍于浙太祖起
兵淮南獻書言事用為中書典籤洪武初從事大都
督府居三年出為知縣閩兩考以病告歸久之卒炳
早工詩律危素來濂叙之謂兼謝康樂岑嘉州韋蘇

州之長楊維禎亦愛其兼工諸體特加評點其為名人推許如此

戴良字叔能浦江人生有異質嗜讀書經史百家登醫卜釋老之說無不綜貫初習科舉業已棄去學古文于黃潛柳貫吳來入其閫與貫卒經紀其家心喪三年余闕持節過婺與良論詩大稱善盡以所聞于師者授之良詩由是益進歲戊戌十二月太祖定金華良入謁語及時事太祖大悅命與胡翰等十二人會食省中日翰二人講經史陳治道明年正月用良為學正與宋濂葉儀輩訓迪諸生太祖既旋師良忽

棄官逸去歲辛丑元王用薦授良江北行省儒學提
舉而時事已不可為乃避地吳中依張士誠久之見
士誠將敗挈家泛海抵登萊欲間行歸擴廓軍道梗
不得達寓昌樂數年訪求齊魯間豪傑奮欲有為而
卒無所遇至洪武六年天下大定始南還變姓名隱
四明山太祖遣使物色得之十五年召至京師試以
文命居會同館太官日給膳欲官之良以老疾固辭
忤旨待罪明年四月暴卒蓋自裁也有文集三十卷
蘇伯衡贊其像曰其跋涉道途也類子房之報韓其
傍徨山澤也猶正則之自放蓋良於元世後不忘故

主每形于歌詩而太祖終以前事為嫌故卒不獲其
死云同時有王逢者字原吉江陰人至正中作河清
頌臺臣薦之稱疾辭張士誠據吳其弟士德用達策
北降于元以拒明太祖士德欲辟用之堅卧不起隱
居上海之烏涇歌咏自適洪武十五年以文學徵有
司敦迫上道時予掖為通事司令以父年高叩頭泣
請乃命吏部符止之又六年卒年七十有梧溪詩集
七卷逢長于仕身未嘗仕元而欲為元遺民於明太
祖多所指斥其戊申歲詩所謂月明山怨鶴天黑道
橫蛇正洪武改元之歲也其狂諄無忌憚如此

徐一夔字大章天台人工屬文典義烏王禕友善洪武二年八月詔纂修禮書一夔及儒士梁寅周子諒胡行簡劉宗弼董彞蔡深滕公琰並與焉明年書成將續修元史禕方為總裁官以一夔薦一夔遺書曰邇者縣吏傳命言朝廷以續修元史見徵且云執事謂僕善叙事薦之當路私心竊怪執事何惓惓于不材多病之人也僕素銷執事知我今日審終不能副執事之望何也近世論史者莫過于日曆日曆者史之根柢也自唐長壽中史官姚璹奏請撰時政記元和中韋執誼又奏撰日曆日曆以事繫日以日繫月

以月繫年猶有春秋遺意至于起居注之設亦專以
甲子起例蓋記事之法無踰此也往宋極重史事日
曆之修諸司必閏白如詔誥則三省必書兵機遺務
則樞司必報百官之進退刑賞之予奪臺諫之論列
給舍之繳駁經筵之論答臣僚之轉對侍從之直前
啓事中外之囊封匭奏下至錢穀甲兵獄訟造作凡
有關於體者無不隨日以錄日曆所以不可忽也然
猶患其出于吏牘或有訛失故歐陽修奏請宰相監
修者于歲終檢點修撰官日所錄事有失職者罰之
如此則日曆不至訛失他時會要之修取于此實錄

之修取于此百年之後紀志列傳取于此此宋氏之
史所以為精確也前元則不然不置日曆不置起居
注獨中書置時政科遣一文學掾掌之以事付史館
及一帝崩則國史院據所付修實錄而已其于史事
固甚疎略幸而天曆間虞集做六典法纂經世大典
一代典章文物粗備是以前局之史既有十三朝實
錄又有此書可以參稽而一時纂修諸公如胡仲申
陶中_立趙伯友趙子常徐大年輩皆有史才史學歷
而咸書至若順帝二十六年之事既無實錄可據又
無參稽之書惟憑採訪以足成之竊恐事未必覈也

言未必馴也首尾未必穿貫也而向之數公或受官
或還山復各散去乃欲不材多病如僕者承乏于後
僕雖欲仰副執事之望曷以哉舟至嘉興驛足疾大
作不能前謹奉狀左右乞賜矜察一獲遂不至未幾
用薦署杭州教授召修大明日曆書成將授翰林院
官又以足疾辭賜文綺遣還一獲遂于經術所作文
率根極理要宋濂亟稱之

顧德輝字仲瑛崑山人家世素封輕財結客豪宕自
喜年三十始折節讀書師友碩彥益購古書名畫葵
鼎秘斲欣賞不倦築別業于葑涇西曰玉山佳處晨

夕與客置酒賦詩其中四方文學士若河東張肅會稽楊維禎天台柯九思永嘉李孝光方外士若張伯雨于彥成琦元璞華威主其家其園池亭榭之盛圖史之富暨饌館聲伎並冠絕一時而德輝才情妙虎與諸名士亦畧相當風流文采照映江左嘗舉茂才授會稽教諭辟行省屬官皆不就張士誠據吳欲強以官去隱于嘉興之合溪吳以子元臣為元水軍副都護戶部封德輝武畧將軍飛騎尉錢塘縣男母喪歸綽漢士誠再辟之遂斷髮廬墓自號金粟道人及吳平父子並徙濠梁以洪武二年卒所著詩曰玉山璞

篆刻交遊詩自楊維禎而下四十餘家曰升堂雅集
並傳于世

月璣字廷臣崇德人性坦率不事邊幅而篤志好學
博通經史百家言善屬文年四十八始領鄉薦張士
誠據平江屢徵不就洪武初被薦聘修元史既成受
賜歸六年以儒士舉至京師除國子助教太祖嘗坐
奉天殿召璣及諸助教趙做錢宰鄭濤等諭曰汝一
以孔子所定書訓課諸生若蘇秦張儀由戰國尚詐
故得行其說慎勿以為教璣等頓首受命嘗慨古樂
不作為大韶賦以見志宋濂之為司業也建議立四

學並祀舜禹湯文為先聖太祖既絀其說璣復為釋
奠解駁之識者多是璣議九年以本官改中都國子
監教勲臣子弟璣學行素優雖將校武夫皆知禮重
十一年致仕歸踰年卒有清江集二十卷傳于世

烏斯道字繼善慈谿人年十八喪父家貧與兄本良
自相師友窮經學古並為州里所推聞邑人趙偁講
卿先達楊慈湖之學兄弟往相辨析務究明本心充
然有得及東南兵起斯道為邑令陳文昭畫策團練
邑賴以安方谷真開府慶元嘗進者競趨之斯道獨
超然自遠洪武五年用廷臣薦授石龍知縣考滿入

觀調知永新有惠政以疾去官士民為立生祠尋以
事謫役定遠居二年放還久之卒斯道工詩古文兼
善少楷行草及琴棋諸藝有秋吟稿春州齋集行世
子熙字緝之亦善詩文同鄉鄭駒字千里弟真字千
之邨人駒持身修潔為文章溫潤縝密明初聘授郡
庠訓導遷義烏教諭東道淑人為宋濂所重真研窮
六籍尤長于春秋洪武四年舉鄉試第一授臨淮教
諭秩滿入見太祖錫之宴命賦菊綻秋風露脂楓葉
詩稱旨除廣信教授自號榮陽外史有雜著詩文六
十卷

唐肅字處敬越州山陰人也通經史兼習陰陽醫卜
書數之學藝為古文簡潔雅興律詩法盛唐樂府古
詩法漢魏至正壬寅奉鄉試以道梗不獲上春官時
越州隸張士誠肅仕為杭州黃岡書院山長遷嘉興
路儒學正明師克士誠例起赴京尋以父喪還洪武
三年用近臣薦召修禮樂書權應奉翰林文字其秋
科舉行為分考官尋扈從皇太子謁英陵拜襲衣之
賜明幣以疾失朝奏例免官歸里六年復謫佃濠梁
踰年卒年四十四有文集十卷肅盛有文名坐微故
遷謫以死士類莫不痛之于之淳字愚士幼侍父歷

游賢士大夫間為宋濂輩所稱許甫弱冠已有聲于
時為文蔚瞻有俊氣尤工于詩當道屢欲薦引輒謝
不就周國公李景隆聘為子師征行四方悉與之俱
由是得歷覽諸邊形勝詩益超絕建文二年詔詞臣
集經史中事為一書考鏡治亂方孝孺以之淳薦帝
雅知其名即召見賜冠帶擢翰林侍讀與孝孺共領
修書事日以前漢書進讀明年卒于官所著有萍居
稿文斷諸書同郡謝肅字原功上虞人少與唐肅齊
名稱會稽二肅博學負氣宣城貢師泰以戶部尚書
轉東閩海肅日執經辨論深為師泰所器張士誠據

平江肅慨然欲見奇自劾師泰為文深戒之然卒無
所遇師泰卒于海寧肅為經紀其喪士誠既城始歸
隱故里洪武十九年舉明經歷官福建按察僉事與
按察使陶垕仲共劾布政使薛大方寔之法出按漳
泉有虎患移文境內之神患遂息坐事被逮太祖御
文華殿親鞠之肅大呼曰文華非拷掠之地天子非
問刑之官請下法司乃下之吏獄吏以土囊壓殺之

有客集

卷

趙堦字伯友新喻人也好學工屬文元至正中舉于
鄉為上猶教諭洪武二年太祖將修元史諭廷臣曰

近克元都得其十三朝寶錄國雖亡事當記載況史
識成敗示勸懲不可廢也乃命左丞相李善長為監
修官附錄汪采濂漳州府通判王禕為總裁官徵小
林道逸之士汪克寬胡翰宋禧陶凱陳基曹雪高啓
趙訪張文海徐尊生黃麓傅恕王鈺傅著謝徽為纂
修官而璫與馬以是年二月開局天界寺取元經世
大典諸書用資參考至八月書成諸儒並賜資遣歸
而順帝一朝史猶未備乃命儒士歐陽佑等往北平
採其遺事明年二月還朝詔重開史局仍以宋濂王
禕為總裁徵四方文學士十四人為纂修而璫復與

馬十四人者堦及朱右月瓊朱廉王彞張孟兼高遜
志李懋李汶張宣張簡杜寅殷弼俞寅也先後纂修
三十人兩局並與者堦一人而已閏六月書成諸儒
多授官惟堦及朱右朱廉不受歸尋召修日曆授翰
林編修高麗遣使朝貢賜宴樂作使者以國喪辭堦
進曰小國之喪不廢大國之禮太祖甚悅命與宋濂
同職史館濂兄事之嘗奉詔撰甘露頌太祖稱善出
為靖江王府長史卒始與堦同纂修者汪克寬陶凱
曹魯高啓趙訪月瓊張孟兼高遜志並有傳今自宋
傳以下附著于篇

宋僖字無逸餘姚人敏悟絕倫元時中乙榜授繁昌
教諭遭亂歸史事既竣被命典試福建鄉試為文縝
密有~~尺~~度詩亦清遠有文集行世

陳基字敬初臨海人少與其兄聚受業于義烏黃潛
從潛遊京師授經筵簡討嘗為人州諫章力陳元主
並后之失元主怒欲罪之引避歸里已奉母入吳教
授自給江南用兵元開行樞密院起基為都事轉江
浙行省郎中叅張士信軍事自杭赴吳復叅太尉張
士誠軍事士誠稱王基獨諫止士誠欲殺之不果已
而超授內史遷學士吳平召修元史賜金而還洪武

三年冬卒于常熟旅舍。初，士誠與太祖相持，基在其幕府，飛書走檄，語多指斥。及吳亡，吳臣多見誅，基獨獲免。世所傳夷白集，其指斥之文猶存，列云：

張文海，鄞人，與同里傅恕並入史館，有詩集行世。少師李東陽，學士程敏政稱其精于樂府云。

徐尊生，字大年，淳安人。七歲能詩，十五淹貫百家元史，成受賜歸。後同修日曆，後宋濂乞致仕，太祖問誰可代者，濂以尊生對，乃授翰林應奉文字，草制悉稱旨。尋以老疾辭還，所著有春秋論一卷，制誥二卷，懷歸還鄉諸集二十卷。

傅恕字如心鄞人學通經史洪武二年詣闕陳治道
十二策曰正朝廷重守令馭外蕃增祿秩均民田更
役法熙寧異端易服制興學校慎選舉罷權鹽停權茶
太祖嘉納之時方修元史命恕與馬事竣授博野知
縣政以躬行為先孳孳撫字有古循良風後坐累死
謝徽字元懋長洲人既修元史授翰林國史院編修
尋擢吏部郎中力辭不拜歸後起國子助教卒徽博
學工詩文與同邑高啓齊名有蘭庭集弟蔡字元功
亦能詩有蕙庭集

朱右字伯賢臨海人為文章淵淪深博元末屢舉不

就洪武初宋濂薦修元史史成辭歸已徵修日曆寶訓授翰林編修遷晉府右長史九年卒官右好著述有春秋類編三史鈎玄秦漢文衡深衣考誤歷代統紀要覽元史補遺及白雲稿十二卷

朱廉字伯清義烏人幼勵志力學淹通經傳長從黃潛學古文遂以文章名知府王宗顯辟為郡學師李文忠鎮嚴州尤加禮敬延為鈎臺書院山長洪武初元史成不受官歸尋徵修日曆除翰林編修八年扈駕中都進詩十章太祖稱善為和六章賜之已而授楚王經遷楚府右長史久之辭疾歸廉好程朱之學

嘗取朱子語類摘其精義名曰理學纂言為文謹嚴
精密有集十七卷

王彝字常宗其先蜀人父為崑山教授遂卜居嘉定
少孤貧讀書天台山中師事王貞文得蘭谿金文安
之傳其學遠有端緒常著論力詆楊維禎目為文妖
洪武初以布衣召修元史賜銀幣還又薦入翰林以
母老乞歸七年坐知府魏觀事與高啓俱被殺所著
有三近齋集

李汶字宗茂雷塗人博學多才徵修元史除己未知
縣移南和並有善政晚年歸里以經學啓迪後進

張宣字藻仲江陰人早負才名洪武初以考禮被徵
尋預修元史太祖親書其名召對殿廷即日授翰林
編修呼為張家小秀才奉詔歸娶年已三十矣六年
坐事謫徙濠梁道卒臨終作詩辭父有出世再當為
父子此心終不隔幽明句聞者哀之

張簡字仲簡吳縣人也初師張伯雨為道士隱居鴻
山元季兵亂以母老歸養遂返儒服洪武三年薦修
元史為詩淡雅有陶韋風翰墨亦為人所重當元之
季浙東兩風物繁華士大夫以文墨相尚每歲必聯
詩社聘一二文章鉅公若楊維禎輩主之四方名士

畢至譙賁流連窮日彌夜詩勝者輒有厚贈臨川饒
介為元淮南行省叅政居吳中風流好客豪于詩句
號醉樵嘗大集諸名士賦醉樵歌簡詩第一贈黃金
一餅高啓次之得白金三觔楊基又次之猶贈一鎰
一時文會之盛唐宋以來未有也

杜寅字彥正吳縣人與修元史歷官岐寧衛知事洪
武八年番賊既降復叛寅與經歷熊鼎俱被害

張孟兼浦江人也名丁以字行有俊才而性矜傲不
肯下人洪武三年被薦召修元順帝史其秋書成授
國子學錄歷禮部主事太常司丞孟兼雅自負能文

奴視儕輩而是時誠意伯劉基以文章有重名未嘗輕許人顧獨喜稱孟堅嘗從容為太祖言今天下文章宋濂第一其次即臣基又次即孟兼其餘臣不知也太祖領之孟兼為基所稱愈自負然竟無殊擢嘗坐累謫輸作已赦出復官自言于宋濂求薦濂亦才孟兼擬薦之一日太祖欲用趙僧願證問濂嘗見其文否時願證方貽書孟兼論性命濂因言孟兼所有其文太祖悅命濂召孟兼以願證文進太祖聞畢顧孟兼謂濂曰卿門人耶濂對非門人乃邑子也其為文有才臣劉基常稱之太祖熟視孟兼曰生骨相薄

仕宦徐徐乃可耳未幾用為山西按察僉事孟兼素
廉勁疾惡至是糾摘奸猾令相牽引每事輒株連數
十人吏民間張僉事行部凜然墮膽聲聞于朝擢副
使移山東布政使吳印者故鍾山寺主僧也太祖驟
責之寵眷甚印以見知天子頗自簡責孟兼自負其
能以印新進且僧也易之印獨孟兼由中門入孟兼
謂已憲司不當入中門召守卒予杖朔望謁先聖諸
生進講孟兼故以語侵印印固已不能堪會有他事
孟兼謂印建制誦策其僚吏且欲上聞僚吏大怖勸
印先發太祖入印言立逮孟兼笞之令還任孟兼既

被辱愈憤卽捕為印書奏者欲論以罪印復上書言
狀請去位以避孟兼于是太祖大怒曰豎儒敢與我
抗耶我今先與爾抗械孟兼至闕下嚴詰之命衛士
捽髮交毆垂死乃棄市報印曰吾除爾害矣善為之
孟兼以才傲人終以傲取禍士類頗惜之願證者會
稽人李姓與同邑正傳並為僧而皆好儒學善古文
太祖既知願證一日御武樓賜宋濂坐從容問曰天
下雖定朕猶垂意宿學之士卿可舉其人濂對曰會
稽僧正傳者學有淵源為文雄贍新麗而根柢六經
要不可以方外棄他日太祖索視其文濂以文進太

祖稱善立召見謹身殿與願證並擢應奉翰林文字
且令長髮母遽出賜願證名證正傳名傳並復故姓
居數月證卒傳尋遷考功監丞大蒙帝眷是歲洪武
七年也傳本郭姓字文遠後僭王蒙華克勤入朝惟
庸第觀亟惟庸誅三人并坐死克勤亦溜流起家為
山西布政使者也

陶宗儀字九成黃巖人父煜元福建江西行樞密院
都事宗儀少試有司一不中即棄去務古學無所不
窺出游浙東西師事張翥李孝光杜本為詩文咸有
程度尤刻志字學工篆氏趙集賢雍篆法家貧教授

松江自給浙帥泰不華南臺御史且驢舉為行人又
辟為教官皆不就張士誠據吳一時名士多舉附議
署為軍諮亦不赴洪武四年詔徵天下儒士六年命
有司舉人才又以病免或問其故嘆曰捧檄為喜所
以為親祿不遠養適增悲耳况今賢良輩出草莽之
臣老死太平幸矣踰分之榮其敢親乎晚歲有司聘
為教官非其志也二十九年率諸生赴禮部試讀大
誥賜鈔歸久之卒初宗儀客松江躬親稼穡作勞之
暇休于樹陰有所得摘葉書之貯一破盎去則埋之
樹根如是十年積盎以十數一日令門人發而錄之

得三十卷名曰輟耕錄又葺說郛一百卷著書史余
要九卷四書備遺三卷並傳于世元末文人最盛其
時以詞學知名者又有張憲周砥高明吳志淳朱芾
藍仁之屬憲字思廉山陰人負才不羈嘗走京師放
言天下事衆駭其狂還入富春山澗沿流以自放一
日升高望遠呼所親語曰禍至矣亟去三日而寇入
死者五百家始悔不用憲言後仕張士誠為其樞密
院都事吳平變姓名寄食杭州報國寺以殘憲學詩
于楊維禎最為維禎所許嘗曰吾門能詩者南北凡
百餘人求其似憲及吳下表華華不能十人砥字履

道吳人僑居無錫博學工文詞與宜興馬治善連龍
往客治鄉治為具舟車盡窮陽羨山溪之勝其鄉多
富人與治善者咸置酒招砥砥心厭之一日貽書別
治夜半遁去歸吳與高荅楊基諸人游書畫並工己
又去游會稽歿于兵治字孝常亦能詩洪武時為內
丘知縣終建昌知府明字則誠永嘉人第至正五年
進士授處州錄事辟行省掾方谷真叛省臣以明諳
海濱事擇以自從與論事不合及谷真就撫欲留置
幕下即日解官旅寓郵之標社明太祖聞其名召之

以老疾辭還卒于家明善詩文所撰琵琶記盛為詞
家所推志淳字主一無為州人工草隸優于文學以
廕歷靖安都昌二縣主簿淮南兵起徙家鄞之東湖
省臣奏除待制為權倖所阻入明遂不仕希字孟辨
莘亭人從楊維禎游才思飄逸千言立就精于篆隸
嘗以所作篆書瘞之細林山中名曰篆塚一時名士
多為作歌洪武初徵授翰林編修改中書舍人仁字
靜之弟智字明之崇安人元時清江杜本隱居武夷
崇尚古學仁兄弟俱往師之授以四明任士林詩法
遂謝科舉一意为詩後辟武夷書院山長遷邵武尉
不赴國初內附例徙濠梁數月放歸以老壽終有藍

山集四卷智洪武十年被薦起家廣西按察僉事著
廉聲有藍澗集

丁鶴年回回人也曾祖阿老丁與弟烏馬兒分巨商
元世祖征西域軍之糧杖策軍門盡以貲獻遂令從
征徇下西北諸國及論功以年老不願仕乃賜田宅
京師奉朝請而烏馬兒累官甘肅行省左丞父職馬
祿丁以世廕為武昌縣達魯花亦有惠政解官後歸
塋其地至正壬辰武昌被兵鶴年年十八奉母走鎮
毋沒鹽酪不入口者五年復避地四明方谷其據浙
東最忌色目人丁鶴年轉徙逃匿為童子師或寄居

僧念賈漿自給越十載海內大定告牒還武昌希生
母以道阻前死瘞東邸廢宅中慟哭行求母告以夢
乃嚙血沁骨歛而塋焉烏斯道為作丁孝子傳鶴年
自以家世仕元不忘故國順帝北遁後飲泣賦詩情
詞悽惻晚歲學浮屠法廬居父墓以永樂中卒鶴年
有至行而好學洽聞精于詩律楚昭莊二王咸禮敬
之正統中憲王刻其道文行世同時元臣不事二姓
者有李祁張昱祁字一初茶陵人好學善詩文元統
元年以左榜第二人授應奉翰林文字母老乞就養
江南改婺源州同知遷江浙副提舉母憂解職隱居

永新山中明師下永新初被傷優卧道左總制余歲
遠人昇歸避正舍禮之太祖下詔徵辟力辭不就卒
年七十餘茂為刻其文集十卷少師東陽其五世孫
也置字光弼廬陵人早游湖海為虞集張翥所知至
正中江浙行省楊左丞辟參軍事遷左右司員外郎
行樞密院判官天下用兵藩省多怙勢侵牟置獨詩
酒自娛超然物表左丞死遂棄官不出張士誠據平
江欲招致之辭不赴寓居西湖謂友人曰我死埋骨
湖上題曰詩人張員外墓足矣太祖徵至京深見溫
接憫其老曰可閒矣厚賜遣還因旬號可閒老人年

八十三而卒有詩集行世

袁凱字景文松江華亭人也元末為府吏博學有才
辨居衆中議論臚發往往屈其座人洪武三年薦授
監察御史時武臣頗恃功驕縱得罪者漸衆其年十
月凱上言諸將曉習兵事恐未悉君臣禮請于都督
府延致通今舉古之士令諸臣早朝後赴都堂聽講
經史庶忠君愛國之心保族全身之道油然而生至
于老成宿將或罹過誤宜加矜恕養廉恥收他日驅
策之効帝納其言始勅省堂延名士直午門為諸將
說書後帝慮囚罪命凱送皇太子獲訊太子多所矜

咸凱還報帝問朕與太子孰是凱頓首言陛下法之
正東宮心之慈帝以凱老猾心持兩端却之凱懼托
瘋疾告歸既而帝遣人密謂之以佯狂得免凱上詩
有盛名性好恢諧既歸自號海叟每背戴烏巾倒騎
黑牛游行九峯間好事者慕之至繪為圖竟以壽終
初凱在楊維禎座客出所賦白燕詩維禎頗嘉之凱
微笑因別作一篇以獻維禎大驚賞徧示坐客凱名
由是起人呼之曰袁白燕

高啓字季迪長洲人博學無不覽先工于詩家居北
郭與王行此鄰其後徐賁高珙志唐肅宋克余克臣

張羽呂敏陳則咸來栖止號為北郭十友又以能詩
號十才子張士誠據吳名士聚集啓獨依外家居吳
淞江之青丘歌詠自適饒介之丁仲容素以詩自豪
見啓詩驚異招致之禮為上客啓謝去仍隱青丘自
號青丘子詩日益富洪武初被薦偕同縣謝微召修
元史並授翰林院國史編修官復命教授諸王三年
秋帝御闕樓啓與微俱入對擢啓戶部右侍郎微吏
部郎中啓自陳年少不敢當重任微亦固辭乃見許
已並賜白金放還初啓在翰林受知于徐酒魏觀等
賦詩薄有諷刺帝微聞而嫌之未發也及觀來知蘇

州啓方居青丘授書自給觀為移其家入郡旦夕延見甚歡七年觀以改修府治獲譴帝見啓所作上梁文因發怒腰斬于市年三十有九明初吳下多詩人啓尤超軼與楊基張羽徐賁並稱四傑蓋以高楊張徐配唐之王楊盧駱云

楊基字孟載其先蜀嘉州人祖宦遊江左基生吳中遂家馬頴敏絕人九歲能背誦六經著書十萬餘言名曰論鑒試禮部不利會天下亂歸隱吳之赤山張士誠辟為丞相府記室未幾辭去客饒介所明師下平江基以饒氏客安置臨濠旋徙河南洪武二年放

歸尋起為滎陽知縣謫居鍾離被薦為江西行省幕
官以省臣得罪落職六年又起奉使湖廣召還授兵
部員外郎出為山西副使進按察使被讒奪官謫輸
作竟卒于工所基工詩初會稽楊維禎客吳中以詩
自豪基嘗于座上賦鐵笛歌維禎驚喜與俱末語其
從遊者曰吾在吳又得一鐵來矣若曹就之學優于

老鐵學也著有眉菴集

張羽字來儀後以字行更字附鳳本潯陽人從父官
游江浙兵阻不獲歸與友徐賁約卜居吳興領鄉薦
為安定書院山長再徙于吳與高啓楊基輩為詩友

洪武四年徵至京師應對不稱旨欲還再徵授太常
司丞太祖重其文十六年自述滁陽王事命羽撰廟
碑尋坐事竄嶺南未半道召還朋自知不免投龍江
以死朋博學好古為文章精潔有法尤長于詩作畫
師小米有靜居集

徐賁字幼文其先蜀人徙常州再徙平江工詩善畫
山水張士誠開府于吳辟為屬未幾謝去復徙湖州
之蜀山及吳平以張氏客謫徙臨濠洪武七年被薦
至京九年春奉使香輿有所廉訪暨還檢其案惟紀
行詩數首他無所賁太祖悅授給事中改御史巡按

廣東又改刑部主事遷廣西叅議以政績卓異擢河南左布政使大軍征洮岷道其境內坐犒勞不時徵下獄竟瘦死所著詩曰北郭集

王行字止仲吳縣人幼穎敏家貧隨父依賣藥徐翁家徐媼老好聽稗官小說行日記數本為媼誦之媼喜言于翁翁授以論語明日悉能成誦翁大異之俾盡讀家所有書遂淹貫經史百家言未弱冠謝去授徒齊門名大起一時名士咸願與交行議論踴厲援據今古常屈其座人臨川饒介居吳自號醉樵為之詩歌者甚衆獨難于一文行曰是非莊騷家言莫罄

其形容即席為說不加點竄介大喜即繕疏薦之會
天下多故未及用富人沈萬三延之家塾每文成酬
白金以鎰計行輒麾去曰使富而可守則然臍之慘
不及矣洪武初有司延為學校師時訓導無祿猶儒
生衣巾諸生多執袴予心易之取五經迭相詰難行
酬答無滯乃始折服郡守魏觀王觀咸禮重行擬薦
之不果行亦謝舉官去隱于石湖四方求文者日至
居久之其二子從于京行往視之京國公藍玉遂館
之于家相得甚歡數薦之太祖得召見後玉被誅行
父子亦坐死時二十八年三月也始吳中用兵所在

多恃砲石自用行私語所知曰兵法柔能制剛若植
大竹于地繫布其端砲石至布隨之低昂則人不能
害而砲石無所用矣後常遇春取平江果如其法行
並自負知兵以及于禍云始高啓有北郭十友行與
宋克余堯臣呂敏陳則並與馬克字仲溫長洲人偉
軀幹博涉書傳少任俠好擊劍走馬能彈下飛鳥家
素饒用結客飲博盡喪其貲迨壯見天下亂思自樹
功業乃謝酒徒去學兵法周流無所遇歸而家居益
以氣節自豪賓客日至時張士誠開府吳中欲羅致
之克不就將中以禍用計獲克性抗直好面折人過

與人議論期必勝然操古切今人亦莫能難久而厭
之杜門染翰日費千紙遂以善書名天下時有宋廣
字昌裔亦善州書遂並稱二宋洪武初克仕為鳳翔
府同知卒克臣字唐卿永嘉人早以文學著客越州
張士誠泰政呂珍羅致幕下與有保城之功薦刻文
上無意仕進治園結茆署曰萊蓮已而入吳為士誠
客及吳城被圍與張瑄輩詩酒倡和不絕城破倒從
濠梁洪武二年放還授新鄭丞敏字志舉無錫人元
時託于方外為道士洪武初官無錫教諭十三年舉
人亦不知其官所終則字文慶崑山人元季慨屋授

徒以工詩名吳下洪武六年舉秀才授應天府治中
俄擢戶部侍郎以閹竇戶口出為大同府同知進知
府則文詞清麗與高啓徐賁輩並為時所稱

孫作字大雅江陰人嗜學喜詩文嘗著書十二篇疏
東家于詞旨弘博宋濂為作東家子傳元季兵起挈
家入吳盡棄他物獨載先世遺書兩篋張士誠聞而
廩祿之旋以母病謝去客居松江衆為買田築室遂
定居焉洪武六年聘修大明日曆授翰林編修乞外
改太平府教授召為國子助教尋分教中都踰年還
國學擢授司業歸卒于家所著有滄螺集同時以博

學著稱者有蔣宮劉永之葉子奇殷奎宮宰伯難真
州人三歲喪母哀毀如成人五歲能誦孝經論語左
氏傳十歲善屬文從學陳子山子山方旣意釋經宮
列諸家傳疏得失以進子山異之語人曰敏悟若宮
雖汝南應世叔不足多也自是以博學聞元至正初
登第以祖喪歸遭亂奉祖母避地浙中薦授行樞密
院管勾銅崇明州判官攝州事明師克平江宮歸附
乞放還田里不許被薦推翰林修撰洪武元年出為
蘭陽縣丞兵燹後居民存者無幾宮廣為招徠踰年
復業五十家弭災捍志興學勸農邑人大和秩滿入

朝以疾卒永之字仲修清江人既冠未知學嘗偕其
姪練伯升同過婦翁翁以伯升有文譽禮之特異永
之內慚歸家發憤就學昕夕不怠數年學大進為詩
文清麗古雅篆隸行草亦有師承文譽更出伯升右
家世素封賒貸通數郡永之泊然布素日坐一室以
翰墨自娛家事一不經意非逢掖世未嘗一接言笑
也所著有山陰集子奇字世傑處州龍泉人明師畧
地至上書總制孫炎為龍鳳王當紹宋正統改紀元
政炎甚禮異之用薦為已陵王簿嘗作太玄本旨究
通衍皇極之說學者多稱之洪武十一年有司祭城

陸神群吏竊飲緒腦酒為諸生所發株連及于奇亦
繫獄乃以瓦研墨有得輒書曰草木予蓋以草計時
以木計歲以況其生平而傷其言之徒立也其書詞
義灝博與所葺齊東野語並行于世奎字孝章崑山
人從楊維禎授春秋有司延訓導州學洪武二年應
詔入都試高等將授郡縣職以母老請近地便養忤
旨除咸陽教諭念母致疾卒于官年四十有六門人
私謚文懿先生弟壁徒步二千里扶其喪歸奎積學
勤于纂述有道學統系圖家祭儀陝西圖經閩中名
勝集崑山志咸陽志委曲叢稿諸書

孫賁字仲衍廣東順德人也性警敏書無所不窺詩
文援筆立就詞采爛然負節概不妄交游元季避亂
山澤間何真據嶺南開府辟士與王佐黃哲趙介李
德並為真所禮遇稱曰五先生將軍廖永忠南征賁
為真草降表一方遂不受兵永忠辟賁典教事洪武
三年始行科舉賁與其選授工部織染司使遷虹縣
主簿兵燹後瘡夷未起賁勞徠安輯民多復業居一
年召為翰林典籍為宋濂樂韶鳳居同筆所稱名籍
甚與修洪武正韻九年遣監祀四川居久之出為平
原主簿坐累逮繫俾築牆望都門賁詎全為粵聲主

者以奏有詔召見命誦所歌詩語皆忠愛乃釋之卅
五年起為蘇州經歷復坐累遣戍遼東已大治藍玉
黨黃嘗為玉題亟遂論死臨刑作詩長詎而逝天下
莫不惜之時門人黎貞亦戍遼東乃得收赦貞字彥
晦新會人坦蕩不羈自放于酒工詩文嘗為本邑訓
導後棄去以事被誣戍遼陽者十八年學愈博識趣
適高從游者甚衆放還卒黃所著有通鑑前編綱目
孝經集善理學訓蒙及西菴集和陶集多散佚不傳
番禺趙純稱其究極天人性命之理為一時儒宗云
王佐字彥舉先河東人元末侍父宦南雄經亂不能

歸遜占籍南海佐才思雄渾為孫賁所重賁與結詩社延一時名士與相倡和論者謂措辭敏捷佐不如賁句意沉着賁亦不如佐佐既歸何真真使掌書記參其謀議時李質在肇慶真恐其有異志遣佐賁二人往說之自是修好不絕質愛士重文學衣冠之士多歸之佐還言于真遣使招致由此士以一藝名者真分館穀之嶺南人文號為一時極盛真既歸朝佐亦還里洪武六年被薦徵為給事中太祖賜宋濂黃馬獲為歌命侍臣屬和佐做頃立成性不樂樞要將告歸時告者多獲重譴或尼之曰少恐之獨不虞悻

命耶佐逢徇二年乃乞骸歸

趙介字伯貞番禹人博通六籍卽釋老諸書亦窮其
奧氣豪邁父母既沒遂無復仕進意行常以囊自隨
遇景賦詩卽投其中絕不為人題咏日往來西樵泉
石間有司累薦皆辭免洪武二十二年生累遠赴京
卒于南昌舟次四子潔綯繹純皆善詩文工篆隸綯
隱居不出有父風純仕為監察御史

李德字仲修番禺人好學能詩文洪武三年以明經
薦至京授洛陽典史歷南陽西安二府幕官並能其
職以年衰乞教乃改漢陽教諭秩滿調義寧時喪亂

後費舍顏祀生徒無幾義寧在粵西元號荒陋德力
為振舉文教漸興解官歸卒德初為詩好學李白李
賀孫贊笑之曰子真混元皇帝裔孫也晚好洛閩之
學謂誠意為古聖結心要故嶺南人稱理學必曰李
仲修云黃哲亦番禺人歷仕州郡以治行稱別有傳